

Monday, May 25, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

CM

Chief Minister Pu Lalduhoma hovin CM Conference Hall-ah Ginger USP Project kalpui dan tur sawihona neih a ni a.

Ginger USP Project hi department 5 velin thawkhoin an kalpui dawn a, Champhai Mualkawiah Sawhthing sawngbawlina pui ber dah a ni ang a, a process-na pui ber a thlen hmaa lo bunlawkna tur a process-na tenau pathum Tualcheng, Zotlang leh Vaphaiah te dah a ni ang.

Spoke Hub-ah hian sawhthingte chu tihfai a, hralh nghal chi leh hralh nghal mai chi loh thliar a ni ang a, a channa a awm ang a, a tihrona a awm bawk dawn ani. Chutianga tih theih loh chin, a oil siamnate, a branding te leh a dangte chu a hmunpui ber Mualkawiah thawh a ni ang.

Kumin chhungin a khawl bun fel hman tum a ni a. A khawlte hi sorkar enkawl lo va mimal investor/ entrepreneurs / soceety te enkawltir tura duan a ni.

Vawiin meeting-ah hian he project kalpui dan tur indawt leh huntiam neia thawh ngai chi zawng zawngte sawiho a ni.



MZP

Mizo Zirlai Pawl MZP chuan vawiin khan Tourism department director atana Pi R. Lalrodingi ruat nawn leh a nih duh loh lantir nan Tourism department hnathawkte pisa kai tur an dang.

MZP President Pu C Lalremruata chuan an hmalakna chu a mimala Pi R Lalrodingi an huat vang a nih loh thu leh mimal induhsakna lian tak a awm nia an hriat chu an duh loh ber a nih thu a sawi a, MZP chuan sorkar hnathawk pension rawih nawn hrim hrim chu tunhma atanga an duh loh thin tawh a nih thu sawiin, thalai hna zawng mekte tan leh zirlai hmabak eng tak tak neite tan inrawih nawna hi an duh lohna an lantir thu leh sorkar pawhin an hmalakna leh an aw a ngaihtlak sak ngei an beisei thu sawiin, an kal leh zel dan tur chu an la ngaihtuah dawn tih a sawi.

Puan tawh angin MZP General Headquarters hian kar liamta Inrinni tlaiah khan inhmukhawm hmanhmawh koin, Zirtawpni-a Mizoram sorkarin Tourism Director charge la tura Pi R Lalrodingi a ruatna order chhuah nawn chungchang a ngaihtuah a, vawiin Thawhtanni (May ni 25) hian Mizoram Tourism Directorate-a thawkte Pisa kai tur dan an rel a ni.

MZP hian Tourism Directorate pisa kawngkapui chu tala-in an kalh a, hruoi pawtin Tourism Director ruat nawna sut an duh thu leh mimal induhsakna an duh loh thute an tar. Police engemzaw zat an duty bawk a, buaina leh harsatna thleng a awm lo.



TRAFFIC

Aizawl Traffic Police chuan dan bawhchhiatna hrang hrang avanga khawpui chhunga lirtheia chetsualna thleng thin titem tur leh mipui him zawk nan Aizawl khawpui chhung hmun hrang hrangah lirthei endikna Special Drive an nei a; kar liamta Inrinni zan khan lirthei dan bawhchhia 74 an man.

Aizawl Traffic additional SP Pu Sainingliana Sailo chuan Akashvani News Aizawl zawhna chhangin, Special Drive hi May ni 23 zan khan an neih tan thu leh neih chhoh zel an tum thu a sawi a; mipui atangin thlawpna a that avangin a remchan dan angin neih chhoh zel a ni dawn a, a hun leh hmun tur erawh sawi lawk theih a ni lo, a ti a; lirthei khalhtute chu fimkhur tur leh mipui kawng kalte pawh fimkhur taka kawng kân thin turin a chah a ni.

Inrinni zan dar 9 hnu lam atangin Aizawl Traffic Police-te hian Special Drive hi an nei a, a tuk Pathianni zing lam thleng an duty a ni. Special drive-ah hian bike ri ring chi 12, license nei loa lirthei khalh 12, chak lutuk leh midang tana hlauhawm taka lirthei khalh 3, rui chunga lirthei khalh 4 leh helmet khum lo leh wrongside-a tlan bakah two wheeler-a mi 3 inphura tlan 43 an man ani.



MHIP LUNGLEI

Lunglei MHIP Sub-Hqrs chuan Lunglei Zotlang ram chhung Zapui Tlanga Solar Power Plant siam tumna chu an duh loh thu an sawi a, a nghawng tur kawng hrang hrang a awm tih sawiin - an tuitlan Tlawng lui tui a kam phah dawn a,

2) Lunglei khawpui boruak nasa takin a lum belh dawn a.

3) Ramngaw leh nungcha hlu tak, uiawm tham an chan dawn a.

4) Solar Panels damchung kum 25-30 hnuah senghawi/ tihrial ngaihna a awm lo an ti a. Hei bakah hian

5) Solar Park vawnfai nan hlo tur hman fo anih dawn avangin Lunglei khawpui tui tlan Tlawng lui tui a tibawlhhlawh dawn an ti a.

6) Solar Park hian kuthnathawktute eizawanna ram zau tak a awh dawn an ti bawk a, hengte avang hian thuneituten Zapui Tlang a Solar Power Plant siam tura hmalakna hi tihtawp sak ngei turin an ngen tih an sawi.

(Thangmingliana Renthlei, PTC Lunglei)

